

中國方志叢書·華北地方·第五三九號

據

清·焦雲龍修，賀瑞麟纂  
光緒六年刊本

影印

陝西 省

# 三原縣新志

(二)

成文出版社有限公司印行

中國方志叢書·華北地方·第五三九號

據

清·焦雲龍修，賀瑞麟纂  
光緒六年刊本

影印

陝西 省

# 三原縣新志

(二)

成文出版社有限公司印行

三原縣新志卷之六

知縣焦雲龍重修

邑人賀瑞麟編纂

人物志第六上

名臣 忠烈 勇略

稟山川靈異之氣被 朝廷棧樸之休固宜奇才偉士輝映一時易曰觀乎人文以化成天下諒哉原自有明以來若端毅若康僖若谿田若恭毅德業問學非後進之師耶十室之邑必有忠信豪傑之士無文猶興吾烏知今無振拔有爲而不以凡民自待者乎人顧視立志如何耳附列女女有士行扶綱常丈夫有弗若者馬谿田蓋嘗言之

名臣十九人

漢吉茂三國志常林傳注字叔暢馮翊池陽人世爲著姓好書不恥惡衣惡食而恥一物之不知建安初關中始平茂與扶風

蘇則共入武功南山隱處精思數載州舉茂才除臨汾令居官  
清靜吏民不忍欺轉武德侯庶子後爲武陵太守不之官轉鄧  
相以國省拜議郎黃初中病亡茂修行從少至長冬則被裘夏  
則裋褐行則步涉食則茨藿臣役妻子室如懸磬其或餽遺一  
不肯受雖不以高人亦心疾不義而貴且富者先時國家始制  
九品各使諸郡選置中正差敘自卿以下至於郎吏功德材行  
所任茂同郡護羌校尉王琰前數爲郡守不名爲清白而琰子  
嘉仕歷諸縣亦復爲通人嘉時還爲散騎郎馮翊郡移嘉爲中  
正嘉敘茂雖在上第而狀甚下云德優能少茂愠曰痛乎我効  
汝父子冠幘刳人耶

唐李靖唐書本傳字藥師三原人姿貌魁秀通書史仕隋爲殿  
內直長吏部尙書牛宏見之曰王佐才也高祖定京師秦王引



爲三衛從平王世充以功授開府蕭銑據江陵召靖安輯陳圖  
銑十策詔拜行軍總管武德四年閔兵夔州時秋濤瀨漲靖曰  
兵以速爲神今乘水傳壘震霆不及塞耳此必禽也銑降或請  
籍銑將拒戰者家貲以賞軍靖曰王者之兵弔人而取有罪止  
不籍乃度嶺至桂州酋領馮盎等皆來謁南方悉定授嶺南撫  
慰大使檢校桂州總管輔公祐據丹陽反召靖入朝授方略東  
討靖出不意率黃君漢等輕兵至丹陽公祐懼出走禽之丹陽  
平置東南道行臺以爲行臺兵部尙書太宗踐阼授刑部尙書  
兼檢校中書令突厥部種離畔帝方圖進取以爲定襄道行軍  
總管率勁卒三千夜襲定襄破之進封代國頡利走保鐵山遣  
使謝罪請舉國內附以靖爲總管往迎之靖謂副將張公謹曰  
詔使到彼虜必自安簡萬騎自白道襲之必得所欲機不可失



韓信所以破齊也督兵疾進遇候邏皆俘以從乘霧行去其牙  
七里乃覺部眾震潰頡利亡去於是斥地自陰山北至大漠遂  
滅其國尋獲頡利可汗於別部落餘眾悉降遷尙書太僕射會  
足疾乞骸骨授檢校就第頊之吐谷渾寇邊以爲西海道行軍  
大總管決策深入大戰數十吐谷渾伏允自經死靖更請立大  
甯王慕容順而還改衛國公進開府儀同三司薨年七十九贈  
司徒謚曰景武按公所著書舊志載三十餘種然多不見今武  
經七書有問對三卷子德謩嗣官至將作少匠坐善太子承乾  
流嶺南以靖徙吳郡靖兄端字藥王以靖功襲永康公梓州刺  
史靖弟客師右武衛將軍累戰功封丹陽郡公致仕居昆明池  
善騎射喜馳獵雖老猶未衰年九十贈幽州都督

**韓瑗**唐書本傳字伯玉三原人少負氣節博學曉吏事貞觀中

以父仲良襲爵永徽三年遷黃門侍郎俄同中書門下三品監修國史進侍中兼太子賓客王后之廢瑗雪泣極諫不納明日復諫曰赫赫宗周褒姒滅之臣讀詩至此常輟卷歎息不意今日親見此禍帝大怒詔引出褚遂良貶潭州都督明年瑗上言曰昔微子既去殷是以亡張華不死晉不及亂陛下富有四海安於清泰忽驅逐舊臣遂不省察乎帝愈不聽瑗憂憤自表歸田里不報顯慶二年許敬宗李義甫奏瑗以桂州授遂良桂用武地倚之謀不軌於是貶振州刺史踰年卒年五十四長孫無忌死義甫等復奏瑗與通謀追削官爵籍其家神龍初武后遺詔復官爵

李朝隱唐書本傳字光國三原人名法中第調臨汾尉擢大理丞武三思構五王御史鄭愔請誅之朝隱以不經鞠實不宜輕

用法忤旨貶聞喜令遷吏部員外郎時政出權幸內授官但斜封其狀付中書宣所司朝隱執罷千四百員遷長安令宦官閭與貴有所干請曳去之睿宗嘉歎進大中大夫一階以旌剛烈成安公主奪民園不酬直朝隱取主奴杖之由是權豪斂伏開元初遷吏部侍郎銓敘明審久之降滑州刺史徙同州擢河南尹政清嚴姦人不容息太子舅趙常奴怙勢橫閭里朝隱執而榜辱之帝賜慰勉授岐州刺史召爲揚州都督府長史還爲大理卿出爲嶺南採訪處置使卒於官贈吏部尚書諡曰貞

後唐任圜五代史本傳三原人明敏善談見者愛其容止李嗣昭節度昭義辟圜觀察支使梁兵築夾城圍潞州嗣昭危甚問圜去就計圜勸嗣昭壁守不可有二心已而莊宗破梁夾城聞圜爲嗣昭畫計甚嘉之由是益知名嗣昭從莊宗敗梁兵於胡



柳園頗有功莊宗勞之曰儒士亦破敵耶仁者之勇何其壯也  
嗣昭討張文禮戰沒園代將其軍卒以信義降之拜工部尙書  
兼眞定尹北京副留守知留守事爲政有惠愛明年郭崇韜領  
成德軍節度使改園行軍司馬尋罷之魏王繼岌暨崇韜伐蜀  
辟園參魏王軍事蜀滅表園黔南節度使辭不就繼岌殺崇韜  
以園代將其軍而旋康延孝反園將三千人會董璋孟知祥等  
共擊敗延孝於漢州拜園同中書門下平章事兼判三司是時  
明宗新誅孔謙園選辟才俊抑絕僥倖公私給足天下便之與  
安重誨議當爲相者二人相惡園求罷職以太子太保致仕退  
居磁州朱守殷反重誨誣園與守殷連謀遣人矯制殺之園受  
命怡然聚族酣飲而死愍帝卽位贈園太傅

**元郝天挺**元史本傳字繼先英爽剛直有志略受業於元好問

以勲臣子世祖召見備宿衛春宮裕宗遇之厚屢遷拜中書右丞與宰相論事有不合輒面斥之成宗崩仁宗以太后命首定大難及武宗還自朔方遂入正大統定策之際天挺與有力焉仁宗臨御天挺與張閭等共議大改革尙書省之弊遂成皇慶之治又出爲江西河南二省右丞召拜御史中丞首陳紀綱之要以獵爲喻曰御史職在擊奸猶鷹揚焉禽之弱者易獲其力大者必借人力不然或有傷鷹之患矣帝嘉其言又疏陳七事曰惜名爵抑浮費止括田久任使論好事獎農務本厲學養士詔中書省舉行之尋拜河南省平章政事河南王卜憐吉歹爲丞相待以師禮由是政化大行卒年六十七贈光祿大夫中書平章政事柱國襲封冀國公諡文定按元史本居安肅州父和尙拔都魯多著武功爲河東行省五路軍民萬戶卒葬三原遂

家焉今按著有新齋集

明趙天泰表忠記建文元年以明經爲翰林編修壬午出亡之日天泰與焉時衣葛因自稱葛衣翁又號天肖子後老死於蜀韓詩贊曰河西傭葛衣翁負羊裘乞市中夜悲泣傷此衷謝主人死勿桐火埋我西北風

來恭谿田通志洪武中貢士拜御史擢僉都御史彈劾不避權貴有讒恭者高皇私幸其第見其妻績棉恭方荷鋤園中遂誅讒者而益重恭

李節谿田通志字文度永樂年以歲貢授給諫論事務存大體遷四川副使振肅風紀氣節凜然宣德間都督陳懷鎮四川擅作威福嘗置一簿列三司名銜令每日入謁次第作花字眾唯惟惟命節獨毅然不可袖簿出遂抗疏劾其不法數事召懷回

京眾服其剛介爭陞按察使卒

段信谿田通志字宗實有氣節勤學強記正統丙辰進士觀政刑部出任杭州司李廉介不撓獄無寬滯擢御史巡按雲南纖塵不染滇人有詩曰擔頭不帶滇南物只插梅花到處香邑人勒碑名其里曰梅香復按南北直隸監軍口外所至風節著聞英宗朝北虜大舉入寇廷臣交推遷僉都出守紫荆關移守倒馬關極力捍禦邊境賴甯遷大理寺左寺丞

王恕明史本傳字宗貫號介菴正統十三年進士授大理左評事遷左寺副條陳刑法不中者六事遷揚州知府天順四年超遷江西右布政使平贛寇憲宗嚴覈天下方面官黜河南布政使侯臣等十三人以恕代臣成化元年南陽荆襄流民亂擢恕撫治之會丁母憂詔奔喪兩月卽視事恕辭不許與尙書白圭



共平大盜移撫河南父憂服除總督河道浚湖修閘因災變請  
講求弭災策帝爲賜山東租一年畿輔亦多減免十二年雲南  
鎮守中官錢能貪恣甚大學士商輅等議改恕右都御史巡撫  
鎮壓初能遣指揮郭景遺安南王黎灝珍奇諸物灝遂欲通雲  
南道又交干崖孟密諸土官納金寶無算諸臣畏匿不奏恕遣  
騎執景景懼自殺因劾能私通外國罪且盡發能貪暴狀能大  
懼急屬貴近召恕還恕居雲南疏凡二十上直聲動天下遷兵  
部尙書嚴拒請託同事者咸不悅而錢能歸屢譖帝亦惡恕數  
直言命巡撫南畿舊制官田徵半租民田全免後民田歸豪右  
官田累貧民怨乃量減官田耗稍增之民田奏以常州羨米六  
萬石補夏稅又補他府戶口鹽鈔六百萬贖所部水災奏免秋  
糧六十餘萬石周行賑貸全活二百餘萬口二十年復改南京



兵部尙書時錢能亦守備南京語人曰王公天人也吾敬事而已恕坦懷待之能卒斂戢林俊下獄恕言佛至千餘寺費內帑數十萬此外也俊言當不宜罪帝不懌恕論列無少避先後應召陳言者二十一建白者三十九皆力阻權倖天下傾心慕之遇朝事有不可必曰王公胡不言也則又曰公疏且至矣已而果至時爲謠曰南京十二部獨有一王恕於是貴近皆側目帝亦頗厭苦之會南京兵部侍郎馬顯乞罷忽附批落恕宮保致仕朝野大駭既歸名益高臺省推薦無虛月孝宗卽位廷臣薦召爲吏部尙書陝西缺巡撫恕推蕭楨詔別推恕執奏卒用楨言官多稱恕賢且老宜置內閣參大政帝曰朕用蹇義王直故事何必內閣也恕感激眷遇益以身任國事方以疾在告聞帝頗擢用宦官再執奏竟報許先是中外劾大學士劉吉者必薦

恕吉以是大恚合私人魏璋等共排之恕知志不得行連章求去帝輒慰留特免午朝遇大風雨雪早朝亦免徽王見沛乞歸德州田盧溝橋成中官李興乞進潘俊等官已修京城河橋興復請授四人官五人冠帶壽甯伯張巒請勳號誥券巒妹壻通政經歷高祿超遷本司參議御醫徐生超補院判中書舍人杜昌義緣遷秩御醫王玉自陳乞進官已得旨恕皆力爭寢之是時劉吉罷邱濬入閣亦與恕不相能太醫院判劉文泰往來濬所求遷官爲恕所沮銜甚恕里居日嘗屬人作傳濬謂其沽直謗君文泰乃訐恕傳中自比伊周以彰先帝拒諫無人臣禮恕以奏出濬指抗言臣傳作於成化二十年致仕在二十二年非有望於先帝也帝下文泰獄鞫之得實置濬不問恕力求去聽馳驛歸廷論以是不直濬及濬卒文泰往弔濬妻叱之出曰以

若故使相公請王公負不義名何弔爲恕數歷中外五十餘年  
剛正清嚴終始一致所引薦何喬新章懋等皆一時名臣賢才  
久廢者拔擢恐後宏治二十年間累正盈朝職業修理號爲極  
盛者恕力也正德三年四月卒年九十三訃聞輟朝贈特進左  
柱國太師諡端毅五子十三孫多賢且顯

按公行事史已詳其大節但諸家所記尙多可傳今依張志  
附載於後陸廷枝說聽云成化丁酉王公巡撫雲南不挈僮  
僕惟行竈一竹食蘿一服無紗羅日給惟猪肉一觔乳豆一  
塊時菜一束醬醃水漿皆取主家結狀出示云欲攜家僮隨  
行恐致子民怨嗟是以單身自來意在潔己奉公豈肯縱人  
壞事人皆錄其詞而焚香禮之烟霞小說云王公鎮滇先  
是中官多不法乃百方冀悅之公不爲動政不便人者悉革  
之並翦其羽翼中人銜之公每出行部導從者十數人而止  
一日公出中人令刺客雜其中將乘隙刺之公於馬上遽曰  
今從者何多一人因檢之得其懷刃客吐實因具爰書赦遣  
之中人聞之欲自殺公偕三司謂之曰我所行之事不過爲  
民除害耳所罪之人不過爲公清惡耳與公何涉毋容過自  
疑也中人乃惶恐謝罪不敢別行非義而百姓安堵矣雷  
禮列卿記云中官王敬乘傳索司玩恕言當此凶歲宜遣官



賑濟而乃橫求玩好耶上乃械敬下獄戮之哀談云韓魏  
公聞更祖宗一法度壞祖宗一紀綱則終日不食富鄭公知  
青州活飢民四十餘萬王公自淮揚以至撫南畿其所全活  
以億萬計愛君憂國之心發於至誠故知無不言言無不盡  
死生以之不但終日不食而已治城客論云王公劾鎮守  
中官諸不法事沒其部下所得金寶輸之京師勳臣世師無  
不斂戢所役官軍士民皆還部業使人至齋無敢索賄勞家  
假驛傳運私貨者皆自雇役於是聲振遐邇西樵記云王  
公爲冢宰署於門曰宋人言受任於朝者以餽及門爲恥受  
任於外者以苞苴入都爲羞今動曰贊儀而不羞於入我甯  
不自恥哉一時帖然使非真誠積久而孚亦自不取書之適  
足以增多口矣獻徵錄云恕在吏部訪海內之士隨器薦  
用以弼成宏治之治柴虎臣考古類編云恕在職裁抑僥  
倖褒獎名節中貴無敢請謁卽舊輔萬安輩有所軒輊亦矚  
矚不輒撓王阮亭池北偶談云邱文莊公濬著世史正編  
持論嚴正至其爲相則逐三原王端毅公惡莊定山欲誅之  
何其明於論古而闇於立身如此王弇州說部云客有問  
明之太臣爲誰曰不知也無已于忠肅之任王端毅之直劉  
忠宣之篤乎又曰大臣者吾必以端毅爲巨擘焉次則劉忠  
宣致致爲國知無不言者端毅也孜孜爲國知無不爲者忠  
宣也張志云經世編云王公羣經無所不涉獵尤熟於書  
詩今考其耄而好學能識其次如啟聖宮雖定議於輔臣張  
聰其說實得於端毅闕里志云宏治元年吏部尙書王恕請  
聖廟祀啟聖王以杞國公無繇萊蕪侯黜泗水侯鯉洙國公